



Eolas maidir leis na poist i Roinn na Gaeilge, Coláiste Phádraig, mí Iúil 2010.

Coláiste Phádraig, Droim Conrach

Tá Coláiste Phádraig ar cheann den dá Choláiste Oideachais is mó in Éirinn. Bunaíodh é sa bhliain 1875 mar Choláiste oiliúna Caitliceach. Tá raon clár léinn san Oideachas agus sa Léann Daonna á thairiscint ag an gColáiste, na cúrsaí seo a leanas ina measc: BOid, BA, Dioplóma Iarchéime san Oideachas (Bunmhúinteoireacht), MOid, MA, PhD agus an Dochtúireacht san Oideachas.

Ó 1993 ar aghaidh, tá an Coláiste mar Choláiste de chuid Ollscoil Chathair Bhaile Átha Cliath agus tá gach cúrsa ann creidiúnaithe ag an Ollscoil. Le blianta beaga anuas, tá méadú suntasach tagtha ar líon na foirne agus ar líon na mac léinn. Tá thart ar 2,500 mac léinn ag freastal ar chúrsaí sa Choláiste faoi láthair.

Chomh maith leis na príomhfhoirgnimh ar champas an Choláiste tá na foirgnimh seo a leanas: árais na mac léinn, Ionad Taighde san Oideachas, Ionad Oideachais do Mhúinteoirí agus naíolann.

Roinn na Gaeilge

Is í Roinn na Gaeilge an roinn acadúil is mó i nDámh an Léinn Dhaonna i gColáiste Phádraig, Droim Conrach. Is roinn bhisiúil í a bhfuil traidisiún láidir teagaisc, taighde agus foilsitheoireachta aici. Tairgeann an Roinn cúrsaí sa Ghaeilge Acadúil mar chuid de na céimeanna BA agus B Oid, cúrsaí sa Ghaeilge Ghairmiúil mar chuid den chúrsa B Oid agus den Dioplóma Iarchéime san Oideachas (Bunmhúinteoireacht), agus cúrsaí acadúla iarchéime, an MA Teagaisc, an MA Taighde agus PhD. Tá deichniúr léachtóirí lánaimseartha ag obair sa Roinn faoi láthair agus foireann líonmhar teagascóirí teanga páirtaimseartha ag cuidiú leo. Gnó lárnach de chuid na Roinne is ea ábhar múinteoirí a chumasú le barr feabhais a bhaint amach mar chainteoirí Gaeilge is mar mhúinteoirí teanga. Déantar é seo trí mheán an teagaisc féin agus trí mhic léinn a ghríosú agus a mhisiú leis an nGaeilge a úsáid mar theanga shóisialta sa Choláiste agus taobh amuigh de. Bheifí ag súil go gcuirfeadh léachtóirí nua le réimse na gcúrsaí atá á thairiscint ag an Roinn faoi láthair agus go nglacfaidís páirt ghníomhach in imeachtaí uile na Roinne.

Na Folúntais

Fáilteofar roimh iarratais ar na poist seo a leanas:

Léachtóir/ Léachtóir Cúnta i Roinn na Gaeilge (post ar chonradh cúig bliana)

Léachtóir/ Léachtóir Cúnta i Roinn na Gaeilge (post ar chonradh dhá bhliain)

Níor mhór cáilíochtaí acadúla den scoth sa Nua-Ghaeilge (bheadh Dochtúireacht inmhianaithe), taithí agus ardchumas teagaisc ar an tríú leibhéal, agus próifíl taighde agus foilsitheoireachta i sainréimse nó sainréimsí de chuid Léann na Nua-Ghaeilge a bheith ag iarratasóirí. Beidh ar na daoine a cheapfar sna poist seo cúrsaí léachta agus seimineáir theanga a mhúineadh ag leibhéal fochéime agus iarchéime, a bheith rannpháirteach san obair forbartha ar shiollabais, ar chúrsaí agus ar acmhainní teanga atá ar bun ar bhonn Roinne, chomh maith le páirt a ghlacadh in obair riaracháin na Roinne agus in imeachtaí agus i seirbhísí oideachasúla an Choláiste i gcoitinne.

Scála Tuarastail:	Léachtóir Cúnta:	€46,474 - €76,853
	Léachtóir:	€50,159 - €81,401

Dualgais agus Cúraimí na bPost

Léachtóir/ Léachtóir Cúnta i Roinn na Gaeilge (post ar chonradh cúig bliana)

Léachtóir/ Léachtóir Cúnta i Roinn na Gaeilge (post ar chonradh dhá bhliain)

Beidh de dhualgais is de chúraimí ar an té a cheapfar in aon cheann den dá phost seo:

1. Léachtaí agus cúrsaí léachtaí a thabhairt ar na cúrsaí fochéime agus iarchéime atá á dtairiscint ag Roinn na Gaeilge, de réir mar a shocrófar leis an gCeann Roinne.
2. Seimineáir i labhairt agus i scríobh na Gaeilge a thabhairt do mhic léinn fochéime agus iarchéime na Roinne, de réir mar a shocrófar leis an gCeann Roinne.
3. Páirt ghníomhach a ghlacadh san obair forbartha ar shiollabais, ar chúrsaí agus ar acmhainní teanga atá ar bun ar bhonn Roinne.
4. Páirt ghníomhach a ghlacadh in imeachtaí taighde na Roinne, idir sheimineáir, chomhdhálacha, fhoilseacháin agus chomhfhiontair taighde.
5. Feidhmiú mar stiúrthóir nó mar chomhstiúrthóir ar ghrúpa nó ar ghrúpaí mac léinn, de réir mar a shocrófar leis an gCeann Roinne. Baineann an stiúrthóireacht seo le freagracht a ghlacadh ar son eagrú agus bhainistiú na gcúrsaí bliana, i gcomhar le comhghleacaithe Roinne agus faoi stiúir Cheann Roinn na Gaeilge.
6. Feidhmiú mar stiúrthóir ar thráchtais iarchéime, de réir mar a shocrófar leis an gCeann Roinne.
7. Páirt a ghlacadh sna cúraimí féitheoireachta a bhaineann le Cleachtadh Múinteoireachta na mac léinn B Oid agus an Dioplóma Iarchéime san Oideachas (Bunmhúinteoireacht).

8. Cibé cúraimí nó dualgais nó freagrachtaí eile a shamhlófaí a bheith réasúnta, a d'iarrfadh Ceann na Roinne, nó a hainmní, air/ uirthi a dhéanamh; agus cibé cúraimí nó dualgais nó freagrachtaí a shamhlófaí a bheith réasúnta a d'iarrfadh Uachtarán an Choláiste, nó a ainmní ar a shon, air/ uirthi a dhéanamh.
9. Páirt iomlán a ghlacadh in imeachtaí agus i seirbhísí oideachasúla an Choláiste i gcoitinne.

Iarrfar ar iarratasóirí a ghlaofar chun agallaimh cur i láthair deich nóiméad ar fad a dhéanamh, díreach roimh an agallamh, ar an ábhar 'Dearadh agus Múineadh Cúrsa Léachta d'Fhochéimithe'.

Cuirfear iarratasóirí faoi agallamh le haghaidh na bpost seo lá éigin le linn na seachtaine dar tús **30 Lúnasa 2010**.

**Níor mhór don iarratas a bheith istigh faoi:
12.00 meán lae ar an Aoine, 13 Lúnasa 2010**